

Filipenses: In amal hual in lanahuatini Pablo quinmijcuiluilic laneltocanijmes pin caltilan Filipos

Pablo quinmijcuiluilía capa unca latzacuali calijtic

1 Tehuanten Pablo huan Timoteo hual ticpialo Cristo Jesús quinami toTeco antimitzjicuiluilijtcate (antimitzscribiruilijtcate) amhuanten hual umpa anchantitica pa Filipos. Amhuanten anuncia Dios ilacames pan ipampa inon hual Cristo anmijchihuilic. Antimitzjicuiluilijtcate amhuanten noje in hueyenten hual anquinmiztía in oc sequin laneltocanijmes huan amhuanten hual anquinpalehuía. ²Ma Dios toTajtzin hual iTajtzin toTata Jesucristo anmijchihuii cuali huan ma anmitzmaca mosehuilisli pa anmoyolo.

Quinami Pablo quilajlaniaya Dios pa yehuanten hual quineltocaloaya pa Filipos

³Nicsehuía noDios mochi quijquiman annimitzjnamiquía. ⁴Mojmosta nicsehuía quiman niclajlanía, nicsehuía Dios pa amhuanten. ⁵Quema, ca paquilisli nilaquetza ca Dios pampa antequipanuc ca nehual pa yoje oc sequin lacames quimatisi in lamachiltisli cuali. Amo anmocaahuac anquichijtíac yojque quiman anpehuac anquineltoac in lamachiltisli cuali. Huan yoje anquichijtía axcan. ⁶Huan

amo nicmahuilía inahuac inon hual Dios anmijchihuilijtica. Nicnequi niquijtía, yahui anmijchihuilía mochi hual pehuac anmijchihuilic pa anmoyolo. Huan laquisas pa in tonali quiman Cristo Jesús hualas oc sejpa pa huelitis nican pan lalticpan. ⁷Huan jan unca cuali pa nehual nicchixtías inon hual nicmati pampa anpanus anmoxtin, pampa mojmosta annimitzpía amhuanten nocnían pa noyolo. Inon unca pampa anquipía in cuali hual Dios anmitzmaca jan quinami nehual noje nicpía. Quema, niquijnamiquía inon capa yes, ma caya quiman niunca latzacuali calijtic, ma caya quiman niquinnextilijtica lacames pampa in lamachiltisli cuali hual niquinmilijtica neli unca Dios ilamachiltisli cuali. Pampín amo lamis cayas yojque. ⁸Inon annimitzilía pampa Dios quimati neli quinami annimitznequi anmoxtin ca in lasojlalisli hual Cristo Jesús nechmaca pa amhuanten. ⁹Huan niclajlanía Dios pa yihual anmitzmachiltis quinami huil anlalasoilas míac. Ma yoje, niclajlanía pa anmitzmachiltis pa anlalasoilas ca lajmatilisli hual yoje cayas ca se lajtulisli ca Dios ilamaxtilisli. ¹⁰Niclajlanía inon pa yoje neli anquimatis len unca in niman cuali pa anquichías amhuanten. Monequi

pa anquimatis inon pa yojque ancayas amo anquixtica len laijlaculisli calica se quinequi anmitzmotexpahuilfa pa mochi in tonalijmes quiman ticchixticate in tonali hual mocuepas Cristo. ¹¹Quema, niclajlanfa Dios pa anmitzhueliltis Jesucristo pa anyultfas anquichijtca in mfac hual cuali hual Dios quinequi pa anquichfas. Yojque moxtin laquetzasi ca lajtomes huejué pa yihual ilahuelilitlisli hué huan ilaixpelalisli cualtichin.

Pa nehual amo unca yulilisli sinda Cristo amo unca ca nehual

¹²Huan nocnfan, nicnequi pa anquimatis inon: Inon hual nechpanuc neli quinpalehuic yehuanten nican pa quimatisi mfac oc sequin in lamachilitlisli cuali. ¹³Quema, niunca latzacuali pa calijtic huan moxtin in guaches hual quiztialo in hué César quimatilo quinami niunca latzacuali calijtic pampa niqinlaquetzilfa lacames ilamachilitlisli cuali Cristo. Huan noje quimatilo inon moxtin in oc sequin hual nican cate. ¹⁴Huan in mfac ca tocnfan hual cate iyaxca toTata yajmo momajtilo mfac quiman quinlaquetzilijtcate Dios ilajtol. Quema, amo momajtilo pa quinlaquetzilisi ilajtol Dios mas que niunca latzacuali pa calijtic.

¹⁵Huan neli, sequin quinlaquetzililo ilajtol Cristo pampa mocualanililo nonahuac nehual huan quinequilo molalilo nopan quinami nolacocolinijmes. Huan oc sequin quilamachilitlo ilajtol Cristo pampa cuajcuali inminyolo huan quinequilo pa oc sequin quimatisi ilajtol yihual. ¹⁶Ca niquic, sequin quilamachilitlo ilajtol Dios pampa quilasojlalo Jesucristo huan ilajtol huan yehuanten hual iyaxca. Quimatilo pampa niunca nican latzacuali pin calijtic pampa nilanextilijtinemiaya quinami in

lamachilitlisli cuali neli unca ilajtol Dios. ¹⁷Huan ca ompic, in oc sequin quilamachilitlo ilajtol Cristo pampa quinequilo mochihualo huejueyenten, inminlaicananijmes yehuanten hual iyaxca Dios. Amo quilamachilitlo ilajtol Cristo ca inminyolo melahuac. Quema, quijtulo laijtic pa inminyolo pampa yalo nechlalililo oc sequin lacocoltlisli pa nipanus nican pin calijtic capa niunca latzacuali. ¹⁸Ma yojque. Ma quinlaquetzilican ilajtol Cristo pa yojque mfac lacames mochihuasi ilanechiculisli inminlamaxtilisli. Ma quinlaquetzilican ilajtol yihual pampa quinequilo pa lacames quimatisi ilajtol Cristo. Cate ca mochi innojen lachihualisli quilamachilitlo yehuanten ilajtol. Ca inon nicpfa paquilisli. Huan amo in san. ¹⁹Noje nicpfas paquilisli pampa nicmati inon hual nechpanujtica quisas cuali pa yojque nehual nicayas lamacahuali.

Huan inon cayas pampa anquilajlantica Dios pa nehual, huan noje pampa nechpalehuifa in iEspíritu Jesucristo. ²⁰Quema, inon quisas cuali pa nehual yojque quinami nicchixtica ca mfac lanequilisli pa panus. Quisas cuali yojque quinami niqijftfa neli pa noyolo huan nicchixtica da amo nicchfa nindeno hual pampa inon nipinahuas. Huan noje quinami nicchixtica axan, nicnequi pa camo nimomajtis nadita pa niqijftus ilajtol Cristo jan quinami mojmosta nicchfac. Inon nicnequi pa yoje nicchihuulis hué Cristo pan ipampa nocuerpo, ma ye sinda niyulis, ma ye sinda nimiquis. Yoje nicnequi pa moitas quinami Cristo unca niman hué huan amo unca nindeno hual ajsis yes hué quinami yihual. ²¹Unca pampa pa nehual sinda niyuli, Cristo monotza mochi, niyuli jan pa yihual san. Huan sinda nimiquis, nicanas mochi pampa nicayas capa yihual unca. ²²Huan sinda niyuli, yojque huil

nicchía míac hual cuali pan ipampa quinami nictequipanuilía. Pampín, amo nicmati len yesquiaya in cuali pa nicchías. ²³Unca etiactica, pampa nimoita lajco pin ome lachihualisli. Pan se lachihualisli, niquisquiaya pa yoje nicayasquiaya ca Cristo pampa inon yesquiaya niman cuali pa nehual. Amo ajsisquiaya caya yoje cuali sinda nimocahua niyultica. ²⁴Ma yoje, pa amhuanten, monequi míac pa nimocahuas nican niyultica pa yojque annimitzpalehuis. ²⁵Huan nicmati pa noyolo pampa amo nía niqui. Nicmati pampa nimocahuas niyultica ca anmoxtin pa yojque anquixtías míac paquilisli pan ipampa quinami anquilalía anmolaneltocalisli ca Jesucristo. ²⁶Quema, nimocahuas niyultica ca amhuanten pa yojque anlaquetzas ca lajtomes niman hué pa Cristo Jesús ipampa inon hual nejchihuilis. Nechmacahuiltis pa nicayas oc sejpa ca amhuanten. ²⁷Jan xiquitacan pa yoje quinami anyulis yes quinami monequi pa yulis se hual quipía ilaneltocalisli pa ilamachiltisli cuali Cristo. Xiyulican yojque. Cuaquinon sinda nihualas annimitzitas o sinda amo nihualas, ma yojque nijcaquis quijtusi pampa anmocajtica jan se pa anmoyolo pan ipampa in Espíritu Santo. Huan nijcaquis quijtusi quinami ca se laijnamiquilisli anmoxtin anmotolintica pa anquinnexilis yehuanten hual molalilo ipan Dios pampa unca melahuac ilamachiltisli cuali capa ticlalilo tolaneltocalisli. ²⁸Huan amo ximomajtican nindeno pampa molalilo anmopan pa anmijchihuilisli tetzcuinuc yehuanten. Sinda amo anmomajtía inminlaixpan yehuanten, cuaquinon pampa inon quimatisi yehuanten anmolacocolinijmes pampa Dios anmitzpalejtica pa camo anmomajtis. Huan quimatisi pampa

yahui quinmijlacúa yehuanten. Ma yoje, inon noje quinmachiltis pampa yihual Dios yahui anmitzquixtilía pin ipolehuilisli anmolajjlaculisli. ²⁹Inon unca pampa Dios anmijchihuilic cuali pa yojque anquilalis anmolaneltocalisli ca Cristo. Huan amo jan in san. Yihual noje anmijchihuilía cuali quiman anmitzmacahuiltía pa anpanus lacocoltilisli pa Cristo. ³⁰Anquitac inon hual nejchihuilije in tonalijmes hual nicataya nepa pa Filipos. Nipanuc míac lacocoltilisli hual nejchihuilije yehuanten, huan axcan anquimati quinami nipanujtica lacocoltilisli nican pin calijtic capa niunca latzacuali. Huan yoje anpanujtica lacocoltilisli amhuanten noje pampa anmijchihuilijticate inon yehuanten in lacocolinijmes hual molalilo ipan Dios.

Cristo mochíac tipichin mas que yihual unca niman hué

2 Cristo anmijchicahualtilía anmoyolo, anmitzlacahualtic pan ipampa quinami anmitzlasojla. Anquipía in Espíritu Santo pampa yihual yuli ca laijtic amhuanten mochi sejse. Axan anquimati quinami yihual anmitznequi huan anmitzicnilía huan pampa inon anquimati anlaicnilía huan anlalasoja. ²Yoje pampa anquipía mochi inon pan ipampa Cristo, xijchihuilican pa nicayas ca niman míac paquilisli. Nicnequi niquijtúa, ximochihuacan se san ca quinami anlajtúa laijtic anmoyolo. Xicpiacan in lasojlalisli se pa oc se huan pa toTata. Xiyén (Xiyecan) ca mochi anmoyolo ca se lajtulisli se ca oc se. ³Amo xilajtucan laijtic anmoyolo quinami anquichías len pa yoje san amhuanten ancanas in hual anquinequi. Amo xicchiacan pa anmitzlasojlas lacames pampa quixtocalo in hual anquichijtica, yoje quinami amhuanten ancataya hueyenten. Yes niman cuali

pa anmoitas amhuanten quinami tijtipichin, huan pa anquijtus laijtic pa anmoyolo pampa oc sequin cate cuali huan amhuanten amo yoje cuali quinami yehuanten. ⁴Mochi sejse ca amhuanten ma camo quitemu quinami quipías in hual cuajnesi unca iyaxca pa quipías. Yes cuali pa quitemus mochi sejse quinami quinpalehuis oc sequin pa quipiasi innojen hual unca inminyaxca pa quipiasi.

⁵Ma laijnamiquican moxtin ca amhuanten yoje quinami Cristo noje laijnamiquic quiman hualaya pin lalticpan. ⁶Yihual amo mocahua pa yes jan quinami Dios unca. Ma yoje, amo quiytuaya laijtic pa iyolo pampa quiipiaya pa nesisquiaya quinami Dios pan ipampa mochi lanextilisli pa yoje lacames quitilosquiaya jan quinami Dios.

⁷Amo quichíac yoje. San mocahuac pa quitequipanus ilahueliltilisli huan mocahuac pa nesisquiaya ca mochi ilaixpelalisli cualtichin calica lacames quiximatilosquiaya quinami Dios. Cuaquinon, pan lalticpan hualac nestataya quinami se hual quintequipanuilía oc sequin. Quema, lacatic pan ipampa se sihual quinami tehuanten, yoje mochijtataya lalac.

⁸Huan nepa capa moitaya nestataya quinami lalac, mochihuaya quinami lalac tipichin, amo quinami se lalac hué hual moixtoca. Huan quineltocaya mochi hual Dios quiliaya, quineltocac quiman Dios quilic pa motemacas pa miquis. Quema, quinmacahuiltic pa quimictisi pan se cuahuil. ⁹Pampa inon, Dios noje quichíac pa yes niman hué, huan quitocayaltic ca se itoca hual lanextilía pampa yihual quipía niman míac lahueliltilisli. Moxtin oc sequin amo quiman ajsisi quipiasi lahueliltilisli yoje hué. ¹⁰Dios quitocayaltic yoje quinami yihual motoca, pa yoje yihual hual itoca Jesús

quinolancuacuetzilisi moxtin pin cielo huan pan in lalticpan huan itzindan in lalticpan. ¹¹Huan moxtin quiqtusi quineltocaticate ca mochi inminyolo pampa Jesucristo unca in Tata, Yojque quiqtuticate míac lajtomes huejué huan cuajcualtichin pa Dios toTajtzin.

In laneltocanijmes lahuilo pin lalticpan

¹²yojque, amhuanten hual annimitzlasojla, amo anmocahuac pa anquineltocasquiaya Dios ilajtol hual annimitzlic. Axcán, jan quinami anquichíac nepa quiman nicataya ca amhuanten, ximoiztiacan míac pa anquichijtías yojque quiman amo niunca ca amhuanten. Huan yojque ximotolintiacan pa anajsis anyes jan quinami Dios quinequi pa ajsisi yesi ixolomes. Huan nepa capa anquichijtía yojque, ximomajtitiacan pa camo anquichías len amo cuali pa camo anquicualantis Dios.

¹³Xiquijnamiquican pampa Dios unca laijtic pa anmoyolo amhuanten pa anmitznequiltis pa anquichías in hual cuali pa amhuanten. Inon unca itequipanulisli hual quilalic pa mochías.

¹⁴Xicchihuacan mochi hual Dios quinequi pa anquichías, huan amo xicualantiacan anmolaxilijtica lajtomes pampa anquipía pa anquichías inon.

¹⁵yojque amo anmitzmotexpahuilisi inminyampa Dios huan lacames huan ancayas chipahuac pa anmoyolo. Neli anyes ixolomes Dios huan yihual amo anmitztlalilis len calica anmitzmotexpahuilisi amhuanten, mas que anuncia ca lacames pin lalticpan hual amo yulilo melahuac. Yulilo ca oc se lamaxtilisli, amo quinami Dios quinlalilic pa yulisi. Dios anmitztlalilic ca yehuanten pin lalticpan pa yoje anyes quinami tixuxlimes pa anquinlahuis lacames laijtic pa inminyolo pa quimatasi ilajtol Dios.

¹⁶Inon amhuanten amo anmocahuas pa anquineltocas. Huan amo anmocahuas pa anquinaquetzilis ilajtol Dios calica yihual quinyuliltía lacames. Pampa in, nilajtus hué huan nilajtus ca paquilisli anmonahuac amhuanten pa in tonali hual hualas Cristo oc sejpa. Inon yes pampa nicmatis pa in tonali amo jan lapic (de in balde) nitequipanuaya chicahuac pa yojque anquipiasquiaya ilajtol Dios. ¹⁷Huan amo inon san. Noje anmotemacac ca Dios quinami se huendi pa anquitequipanuilis pampa anquineltoca Jesucristo. Huan nehual sinda nechmictisi huan quisas noesli quinami se huendi, yojque yes anmohuendi amhuanten noje. Huan pampa inon nicpías paquilisli. Noje nehual huan anmoxtin ticpiasi paquilisli. ¹⁸Jan yojque, xicpiacan paquilisli, noje ca nehual ma ticpiacan paquilisli.

Timoteo huan Epafrodito

¹⁹Ma yoje, sinda in Tata Jesús quichijchá mochi pa huil nicchías, nicchixtica pa camo nihuejcahuas pa annimitztilanilis Timoteo pa yojque nehual noje nicayas lapaquilti quiman nicmatis quinami anunca huan len anmitzpanujtica. ²⁰Annimitztilanilijtica Timoteo, pampa amo nicpía oc se nican quinami yihual hual laijnamiquía lajitic pa iyolo quinami nehual quiman annimitzijnamiquía amhuanten. Yihual Timoteo neli anmitzijnamiquía ca mochi iyolo jan quinami nehual. Yihual quinequi pa mochi quisas cuali pa amhuanten. ²¹Amo nicnequi nictilani oc se, jan Timoteo san. Moxtin in oc sequin jan quitemulo len pa mopaquiltisi yehuanten san, amo pa quipaquiltisi Cristo Jesús. ²²Ma yoje, amhuanten anquimati quinami cuali yihual tequipanúa. Nechtequipanuilic quinami se xolol quitequipanuilía

itajtzin, pa yoje mías oc sequin lacames quimatisi in lamachtilisli cuali. ²³Yoje, nicchixtica pa nictilanis yihual jan axcan, san pa in tonali hual niqitas quinami yahui nechpanúa nican pin calijtic capa niunca latzacuali. ²⁴Huan nicmati pa noyolo inon hual in Tata nechnextilic. Nehual amo nihuejcahuas nías ca amhuanten pa annimitzitas.

²⁵Ma yoje, niquijtuc pampa monequi pa annimitztilanilis Epafrodito. Yihual nocni ilaneltocani Cristo, tictequipanuililo Cristo tiomenten, huan tipanulo lacocoltilisli pa Cristo tiomenten quinami guaches. Annechtilanilic pa yihual nechpalehuis pampa monequiaya pa nicpiasquiaya lapalehuilisli. ²⁶Annimitztilanilijtica axan jan pampa yihual quimatic quinami anquicaquic pampa cataya cocoxqui. ²⁷Huan neli cataya cocoxqui, ca je tipichin miquiaya. Ma yoje, Dios quicnilic huan quipajtic, huan amo yihual san. Nehual noje nechicnilic Dios pampa quipajtic Epafrodito pa yoje amo nechcocujtiasquiaya noyolo oc sejpa mías quinami nechcocujtataya quipiaya tonalijmes. ²⁸Pampín, niejsehuía mías ca annimitztilanilis, pa yoje pan tonali hual anquitas, cuaquín anquipías paquilisli oc sejpa huan yojque mosehuis noyolo. ²⁹Xicnamiquican cuali ca mochi paquilisli, pampa yihual anmocni pan ipampa in Tata. Xicpilican lacames quinami yihual mías lasojlalilisli. ³⁰Yihual quitequipanuiliaya Cristo huan pampín ca nadita yihual yahuiaya miqui. Quema, yihual molalic capa ca nadita yihual yahuiaya miqui pa yoje huil nejchihuilis mochi hual amhuanten amo huil annejchihuiliaya.

Quijtúa Pablo quinami se quipías yulilisli hual neli melahuac

3 Huan nocnían, unca inon hual mocahua pa annimitzilis: Ma

annimitzili xicpiacan paquilisli pampa amhuanten anunca Dios ixolomes. Amo nimomaca tequil pampa annimitzicuiluilía in lajtomes oc sejpa. Huan pa amhuanten yes cuali pampa anmijtzacuilis pa camo anquitas polehuilisli. ²Ximoiztiacan pa camo anmitzcuajcuamanas in lamaxtinijmes hual yulilo amo cuali quichijtcate quinami pelojmes. Quinctinemilo quipalalo Dios ilamaxtilisli ca inminlamaxtilisli yehuanten. Quijtulo monequi pa anquipías latequili anmocuilaxli pa yoje momatis pampa anunca ixolomes Dios, jan quinami latequilo in judíos. ³Quema, ximoiztiacan pampa in lamaxtinijmes cate amo cuajcuali. Tehuanten neli ticate Dios ixolomes. Tehuanten ticpialo ilanextilisli Dios pa toyolo. Sinda se quipía in lanextilisli pa icuilaxli san, inon amo monotza pa lanextilis pampa yihual unca se ca Dios ixolomes. Tehuanten ticmolancuacuetzililo Dios pan ipampa in Espíritu Santo huan tiquililo lajtomes huejué Cristo Jesús pampa techquixtilic tolaijlaculisli. Ticmatilo pampa amo monotza nindeno in hual huil ticchihualo tehuanten tohuían, pampa amo techpalehuía nindeno pa timochihuasi ixolomes Dios. ⁴Sinda huil timochihualoaya ixolomes Dios pan ipampa len ticchihualo, cuaquín nehual nicchihuaya inon, sinda nicmatiaya pampa yoje nimochiasquiaya se ca Dios ixolomes. Sinda cataya oc se lacal hual quijtuaya pampa ca yihual unca iyaxca pa mochías se ca Dios ixolomes pan ipampa ilahueliltilisli hual canac pan ipampa len quichíac, cuaquín nehual niquijtuaya unca noyaxca pa nimochías se ixolol Dios ca lahueliltilisli hué hual in se ilahueliltilisli amo quiman ajsis yes yoje hué. ⁵Inon niquijtúa, pampa nechlalilije nopan inminlanextilisli in judíos quiman nilacatic huan niyulic

chicué tonlijmes. Nilacatic israelito, nehual se imiahuimes Benjamin hual yec se ca in doce (majlacli huan ome) lacames hual quinpehualtije in israelitos. Quema, nehual niunca se hebreo pampa notajtzitzían yeje mochi hebreos. Huan ilajtol Dios hual in judíos quimaxtilo nicneltocac yojque quinami motolinilo in fariseos pa quineltoacasi ca niman míac chicahualisli. ⁶In oc sequin nocnían judíos amo chahuatiloaya inahuac mochi hual quineltoacalo in judíos quinami nehual nichahuatiaya. Huan nicnequiaya pa yoje yuhtalosquiaya. Quema, niquintojtocaya pa niquinchihuilis lacocoltilisli yehuanten in judíos hual quilalije inminlaneltocalisli ca Jesucristo. Huan moxtin in fariseos nechitaloaya quinami se hual amo quipiaya laijlaculisli, pampa nicchihuaya mochi hual quijtúa in lajtol hual quimaxtilo in judíos. In lajtol quinnextilía quinami yehuanten quipialo pa quitequipanuilisli Dios. ⁷Inon niquijtuni cataya lapalehuilisli pa nehual hual nicpiaya pampa nicchihuani mochi hual quijtúa in lajtol. Axan niquita pampa amo unca tipichin lapalehuilisli pa nehual, pampa nicpía mochi lapalehuilisli pan ipampa Cristo. ⁸Quema, neli niquijtúa noje pampa mochi capa niclalic nolaneltoacalisli amo nejchihuilic nadita lapalehuilisli. Unca yojque, pampa axan niquiximati Cristo Jesús noTata huan inon monotza niman míac, amo yoje míac monotza inon hual niquijtuni pampa catani lapalehuilisli pa nehual. Huan pampa niclalic nolaneltoacalisli ca Cristo, nicpoluc mochi hual nicpiaya.

Ma yoje niquita mochi in hual nicpoluc jan quinami se bagazo palanquil, pa yojque nicpías Cristo quinami noTeco huan mochi hual quipía pa nechmacas. ⁹Quema, niquita mochi inon hual nicneltocani quinami

cuilal pa vojque Dios nechitas san se ca Cristo. Axcan Dios nechitas amo ca laijlaculisli. Inon amo cayas pampa niccháac in hual quijtúa in lajtol hual quimaxtilo in judíos. Cayas pampa niclalic nolaneltoctalisli ca Cristo. Yojque Dios quijtúa pampa se amo quipía laijlaculisli pampa in se quilalía ilaneltoctalisli ca Cristo.

¹⁰Huan nicnequi nicpía Cristo huan nicnequi nicaya san se ca yihual pa yoje niquiximatis huan pa nicmatis ilahueliltilisli hué. Quinextilic inon pan tonali hual yulic oc sejpa. Quisac pin mijquimes. Huan nicnequi nicpía Cristo pa nicpías nolaxilulislí ca quinami yihual panuc lacocoltilisli. Nehual nicnequi nimoita quinami se hual miquic ca Cristo pan tonali hual yihual miquic, pa yoje yajmo niyulis quinami niyulini. ¹¹Inon nicnequi ma ye quinami yes, pa yoje niajsis niyulis oc sejpa pa nicayas ca Cristo quiman nimiquis.

Pablo motolinía pa ajsis capa Cristo quinequi pa cayas

¹²Amo niquijtutica pampa nicajsis mochi hual Cristo quipía pa nehual. Huan amo niquijtutica yihual nejchihuic pa niyes mochi quinami yihual quinequi. Ma yoje, niman nimotolinía pa nimoyaxcajtulis in hual Cristo quipía pa nehual. Niccháa yoje pampa nicmati Cristo Jesús nechmoyaxcajtlic. ¹³Nocnían, niquijtúa lajtic nehual pampa nehual ayamo nicmoyaxcajtlic in hual Cristo nechpilía. Jan in se san niccháa. In hual nechpanuc yajmo nicmacahuilía pa nejzacuulis pa como niyultías huan pa como nicchíjtás quinami Dios quinequi pa nicchías. Yoje, quinami se hual molalúa ca laluxtilisli, niman nimotolinía ca mochi nolahueliltilisli pa nicajsis in hual unca nolaixpan, in hual Dios quipía pa nehual. ¹⁴Quema,

niman nilatojtocatía pa niajsis capa Dios quilalic pa niajsis, nicnequi niquijtúa, capa nicajsis in laxlahuilisli. Pa inon pan ipampa Cristo Jesús, Dios nechnotzac pa nicanas iojli hual nechuica pa in cielo (ilhuicac). In laxlahuilisli unca noyulilislí yancuic hual nicpía pan ipampa Cristo.

¹⁵Yoje, tehuanten hual huil tilajnamiquilo cuali inahuac in hual unca iyaxca Dios, ma ticmatican lajtic pa toyolo pampa ayamo tiajsije tiyeje quinami Dios quinequi. Huan sinda sequin ca amhuanten anquijtúa ca oc se laijnamiquilislí, cuaquinon Dios noje anmitzmachiltis quinami amo unca melahuac in hual anquijtutica pa anmoyolo. ¹⁶Jan ximoiztiacan pa anmocajtías mojmosta pa iojli Dios. Huan ximoiztiacan pa como anmocajtías pa anquineltoctas mochi hual anmonextilic quinami monequi pa anyulis pan Dios iojli, hual anquimati axan.

¹⁷Nocnían, xicayacan quinami nehual, xiyultiacan quinami nehual niyuli. Xiquitacan yehuanten hual yulilo yoje huan xiyulican quinami yehuanten, jan quinami antechitac tehuanten tiyuliloaya. ¹⁸Nicpía pa annimitzijnamiquiltis inon. Unca pampa míac annimitzilic sejpa huan oc sejpa quinami cate míac hual quijtulo pampa cate Dios ixolomes. Ma yoje, yulilo quinami ilacocolinijmes Cristo. Amo quineltoctalo in lajtol hual quinnextilic quinami Cristo miquic pin cuahuil pa yehuanten. Huan axan nichoca annimitzilijtica inon. ¹⁹Yehuanten moijlacusi, pampa inon panusi lacocoltilisli. Amo quimolancuacuetzililo Dios, jan quijtulo pa inminyolo quinami quinmacasi paquilisli inmincuerpos. Moixtoctalo ca mochi hual quichihualo hual lapinajtilo. Jan quijnamiquilo san len huil canaló nican pan lalticpan. ²⁰Ma

yoje, tehuanten tolali capa ticpialo in hual toyaxca neli unca pin cielo (ilhuicac), ticate ichantinijmes in cielo. Ticchixticate pa hualas quistica pa nepa toTata Jesucristo hual techquixtilis pa mochi in polehuilisi hual tipanulo nican. ²¹Yihual techpatilis tocuerpos hual nican pin lalticpan mococulo huan palanilo huan miqulilo. Techpatilis pa mochihuasi tocuerpos yajyancuic quinami yihual icuerpo. Yajmo miquisi, san quipiasi laixpelalisi huan chichahualisi cualtichin. Inon Cristo tejchihuilis pan ipampa ilahuelitilisi calica huil quinneltocaltis mochi pa yihual.

Amo ximocahuacan pa anquipías paquilisi pan ipampa in Tata

4 Yoje, nocnán, xicayacan melahuac pan iojli in Tata, yoje ca ilahuelitilisi. Annimitzlasojla, nicnequi annimitzita míac. Annechmaca míac paquilisi. Huan pampa amhuanten anquineltoca Cristo, pampa in nicmati amo jan lapic (amo de in balde) annimitzlaquetzilig Dios ilajtol. Yoje, amhuanten hual annimitzlasojla, anunca quinami se laxlahuilisi pa nehual, quinami in hual cajsí se hual cajsic laicanac ca se laluxtilisi.

²Amhuanten, Evodia huan Síntique, annimitzljalanía ca mochi noyolo, xicayacan ca se lajtulisli quinami anquitequipanuíla in Tata. ³Quema, huan nimitzljalanía tehual nocni lasojli hual titequipanulo tiomenten, xiquinpalehui in ome sihuames. Yehuanten tequipanuje chichahuac ca nehual pa quilamachiltisi in lamachiltilisi cuali. Jan yoje quichihuaje Clemente huan in oc sequin hual titequipanuje timoxtin. Dios quinmiximati huan quinpía inmintocajmes lajcuiluli pa iamal capa cate inmintocajmes yehuanten hual

quipialo iyulilisi yancuic hual yihual quinnamac. ⁴Xicpiacan paquilisi mojmosta pampa anquipía in Tata pa anmoyolo. Niquijtus oc sepa: iXicpiacan paquilisi! ⁵Xiyulican mojmosta xiquinpalejtian moxtin. Huan amo ximotemachilijtiacan innojen hual anquijtúa cate anmoyaxca pa anquinpiás. Yoje moxtin quimatisi quinami anyuli cuali. Xicchihuacan yoje pampa amo huejcahuas pa hualas in Tata.

⁶Amo ximacahuiltican nindeno pa anmitzquixtilis amosehuilisi pa anmoyolo. Xiclaquetzilican Dios mochi len yes hual anmitzpanus, pampa inon yes cuali pa amhuanten. Xicljalanican chichahuac huan xicsehuican, yoje xiclamachiltican Dios len monequi pa anquipías. ⁷Huan anquipías mosehuilisi pa anmoyolo hual Dios anmitzmacas. Amo huil ticmatilo quinami Dios techlalilía imosehuilisi pa toyolo. Ma yoje, anmitzquixtilía mochi hual anmitzmajtía, anmitzilitijtica anmoyolo huan mochi hual anquijtuc lajtuc pa anmoyolo pa yojque ancayas se san ca Cristo Jesús.

Xiquijnamiquican len unca cuali

⁸Axcan nocnán, jan in mocahua pa annimitzilis: Len yes hual unca neli huan len yes hual monotza pa quilasojlasi lacames huan len yes hual unca melahuac, huan len yes hual unca chipahuac, huan len yes hual unca cualtichin huan len yes hual moxtin quijtulo unca cuali, quema, sinda anquimati len yes hual unca niman cuali huan sinda anquimati len yes hual monotza pa lacames laquetzasi hué inahuac inon, cuaquín xiquijnamiquican mochi inon pa anmitzpalehuis pa anyulis cuali.

⁹Anmonextilic míac pan nopampa nehual, anquinmanac míac pan nopampa, anquicaquic míac pan

nopampa huan anquimati m'fac pan nopampa. Pampín, xiyulican xicjihjiacac yoje quinami annimitznextilic. Huan cayas ca amhuanten Dios hual techmaca mosehuilisli pa toyolo.

In laneltocanijmes de Filipos quimacaje m'fac Pablo

¹⁰In Tata nechmacac niman m'fac paquilisli pampa oc sejpa anpehuac anquijituc lajitic pa anmoyolo quinami huil annehcpalehuis. Neli, amo quiman annehilcahuaya. Ma yoje, amo anmitzajsiaya tonali capa huil annehcpalehuisquiaya. ¹¹Amo annimitzilijtica inon pampa monequi pa nicp'as len. In unca pampa nimonextilic pa nimocahuas ca paquilisli ca len yes nicp'ía o amo nicp'ía. ¹²Nicmati niyuli ca paquilisli, sinda nicp'ía nadita, huan sinda amo nicp'ía nindeno. Huan nicmati niyuli ca paquilisli sinda nicp'ía m'fac. Sinda nicp'ía miactzindi o nadita, nicp'ía paquilisli. Quema, mochi tonali quijqiman huan cajcapa nimoitac, nimonextilic len Dios san quip'ac pa nechnextilis. Nicmati nipachihu'á huan nicmati nimayana. Nicmati nicp'ía m'fac huan nicmati amo nicp'ía m'fac. ¹³Huil nicch'ía mochi hual Dios nechmaca pa nicch'ías, huan nicch'ía pan ipampa Cristo hual nejchicahualt'ía. ¹⁴Ma yoje, ma annimitzili niquita niman cuali inon hual annejchihuilic quiman ca nehual ancanaya len lacocoltilisli quinami nipanuyaya. Huan annehcpalehuic ca in hual monequiaya pa nicpiasquiaya.

¹⁵Amhuanten pa Filipos noje anquimati quinami pan tonali hual nipehuac annimitzilic in lamachilitisli cuali huan cuaquinon pan tonali hual niquisac pin lalticpan Macedonia, amo cataya se ca inminlanechiculisli Cristo ilacames hual quichihuaje se

lajtulisli pa nechmacatialesquiaya inon calica nimolacualtis. Ca in lajtulisli, nechmacalosquiaya len monequi pa nimolacualtisquiaya huan yehuanten Dios quinmacasquiaya in cuali hual quip'ía pa yehuanten. Jan amhuanten pa Filipos san anquich'ac se lajtulisli pa annehcpalehuis. ¹⁶Yoje, quiman nicataya pin ciltlan Tesalónica, amhuanten annechtlanilic len pa nimolacualtis sejpa huan oc sejpa. ¹⁷Amo annimitzilijtica inon pampa nictemujtica pa annechtlanilic oc sejpa huan oc sejpa. Jan nictemúa quinami huil momiactit'ías in cuajcuali hual anquich'ía anquitequipanuilijtica Dios. Yihual moijnamiquiltis ca mochi huan anmijchihuilis niman cuali. ¹⁸Huan nicanac mochi hual annechtlanilic, quema, axcan nicp'ía m'fac hual monequiaya pa nicp'ías. Axcan tentica capa nicajcoqu'ía mochi hual annechtlanilic, pampa nicanac in hual annechtlanilic ca Epafrodito. Pa Dios in unca quinami se huendi hual aju'ac. Nicnequi niqijit'ía, inon hual annejchihuilic neli unca se huendi pa Dios hual yihual quixtocas quip'ías, mocahua ca paquilisli ca inon. ¹⁹Huan noDios anmitzmacas mochi hual monequi pa anquip'ías pan ipampa Cristo Jesús. Yoje, quinami amo quiman lamis in m'fac cuali hual Dios quip'ía, jan yoje amo lamis anmitzmacas. Yoje unca quinami yihual quich'ía mochi ca ilahuelilitisli hué. ²⁰Ma toTajtzin Dios quip'ía pa mochi tonalijmes mochi tolasojlalisli huan ma quincaqui mochi tolaajtomes huejué huan cuajcualtichin pa yihual. Yoje ma ye.

Lami iamal ca lapialtisli

²¹Xiquinchicahuacan moxtin yehuanten ilacames Cristo. Xiquinchicahuacan yoje quinami monequi anquinchicahuas yehuanten

hual iyaxca Cristo. Tocrían hual
nican cate ca nehual anmijchicahualo.
²²Anmijchicahualo moxtin in oc
sequin ilacames Cristo. Ca yehuanten
anmijchicahualo niman míac ilacames

Cristo hual chantilo pa ichan César
ihué in lali Roma.
²³Ma caya ca amhuanten anmoyolo
in cuali hual san huil anmijchihuilía
toTata Jesucristo. Yoje ma ye.